

Tus uas muaj lub siab hlub lwm tus, tus ntawd tau koobhmoov, Vajtswv yuav hlub nws. Tus uas muaj lub siab ncajnrees, tus ntawd tau koobhmoov, nws yuav pom Vajtswv.

Tus uas ua rau neeg nyob sib haum, tus ntawd tau koobhmoov, Vajtswv yuav hu hais tias, nws yog Vajtswv menyuam.

Tus uas raug luag tsimtxom vim nws ua raws li Vajtswv lub siab nyiam, tus ntawd tau koobhmoov, Vajtswv twb los kav nws lub siab lawm.

Thaum luag ua saib tsis taus nej, tsimtxom nej, thiab hais nej plig vim nej yog kuv cov thwjtim, thaum ntawd nej yuav tau koobhmoov.

Nej cia li zoo siab, rau qhov Vajtswv twb npaj nqizog ntau kawg cia rau nej puag saum ntuj Ceebtsheej lawm. Thaum ub twb muaj neeg tsimtxom cov xibhwb cev Vajtswv lus ib yam nkaus li no lawm thiab.

Nej zoo li cov ntsev las neeg ntiajteb. Yog ntsev tsuag lawm yuav ua li cas kom rov qab qab tau, cov ntawd tsis muaj nujnqis dabtsi, tsuas muaj yuav muab povtseg thiab neeg yuav tsuj xwb.

Nej zoo li lub teeb ci rau neeg ntiajteb pomkev. Lub nroog uas nyob saum roob, yeej tsis muaj ib yam dabtsi thaiv tau.

Tsis uas taws teeb yeej tsis muab phiab khwb lub teeb ib zaug li. Nws yuav muab txawb cia rau qhov siab kom tej neeg hauv tsev pomkev xwb.

Ib yam nkaus li ntawd nej yuav tsum ci rau tej neeg kom lawv pom tej haujlwm zoo uas nej ua, lawv thiaj yuav qhuas nej Leejtxiv tus uas nyob saum ntuj Ceebtsheej. (Mathais 5:1-16)

372

YEXUS LOS YUG

Yexus yug hauv lub moos Npelehees hauv Yudais tebchaws. Lub sijhawm ntawd Helauj ua Vajntxwv. Tomqab ntawd tsis ntev, cov neeg txawj saib hnuqbub, muaj ob peb leeg taug kev puag tim sab hnubtuaj, tuaj txog hauv lub nroog Yeluxalees.

Lawv nug hais tias, tus metub uas yug los ua cov neeg Yudais tus Vajntxwv nyob qhovtwg? Peb pom lub hnuqbub uas qhia hais tias, nws yuav los yug, tawm puag pem hnub tuaj, peb thiaj tuaj hawm nws.

Cov neeg txawj saib hnuqbub txawm tawm mus. Thaum lawv tabtom taug kev mus, lawv pom lub hnuqbub uas lawv xub pom puag pem hnub tuaj... lub hnuqbub ntawd coj lawv kev mus, nws nres ncaj qhovchaw uas tus metub ntawd nyob lawm saud. (Mathais 2:1,2, 9)

Nyob ze lub moos Npelehees ntawd, hmo ntawd muaj ib co neeg yug yaj tabtom zov lawv tej yaj tom tshav zaub.